



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08 i 5/22), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2021. GODINU LABURISTIČKE STRANKE BOSNE I HERCEGOVINE

Broj: 03-07-6-437/22  
Sarajevo, 09.04.2024. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole .....	5
Cilj pregleda i kontrole .....	5
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1 NALAZI .....	5
5.2 PREPORUKE .....	10

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Laburističke stranke Bosne i Hercegovine za 2021. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2021. godinu, utvrđeno je da je Laburistička stranka Bosne i Hercegovine prekršila odredbe člana 4. stav (1), člana 11. stav (1) i člana 12. stav (1) i stav (4) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Laburističke stranke Bosne i Hercegovine za 2021. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Laburistička stranka Bosne i Hercegovine se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	382,32	0,18
2.	Prilozi fizičkih lica ( 3-a )	9.516,00	4,48
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	200.468,70	94,40
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>210.367,02</b>	<b>99,06</b>
<b>II</b>	<b>Ostali prihodi i drugo</b>	<b>2.001,87</b>	<b>0,94</b>
	<b>Izvori finansiranja (I+II)</b>	<b>212.368,89</b>	<b>100,00</b>

U godišnjem finansijskom izvještaju za 2021. godinu, Laburistička stranka Bosne i Hercegovine iskazala je rashode u ukupnom iznosu od 190.380,96 KM.

## 2. PREDSTAVLJANJE POLITIČKE STRANKE

Naziv političke stranke je Laburistička stranka Bosne i Hercegovine. Skraćeni naziv stranke je Laburisti BiH.

Laburistička stranka Bosne i Hercegovine je registrovana kod Općinskog suda u Bihaću, rješenjem broj: 017-0-RegPO-14-000001 od 14.01.2014. godine.

Sjedište stranke je u Velikoj Kladaši, Ibrahima Mržljaka 84.

Lice ovlašteno za zastupanje Laburističke stranke Bosne i Hercegovine je Elvira Abdić Jelenović, predsjednik stranke.

Lice ovlašteno za podnošenje finansijskih izvještaja za 2021. godinu je Amir Đogić.

Prema podacima iz godišnjeg finansijskog izvještaja za 2021. godinu, Laburistička stranka Bosne i Hercegovine ima sljedeću organizacionu strukturu:

- Centralni ured Laburističke stranke Bosne i Hercegovine.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Laburističke stranke Bosne i Hercegovine za 2021. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Laburističke stranke Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE KONTROLE I REVIZIJE

Služba za reviziju je izvršila pregled i kontrolu finansijskih izvještaja Laburističke stranke Bosne i Hercegovine u periodu od 2014. do 2020. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2020. godinu, izdat je izvještaj o pregledu sa mišljenjem i nalazima revizora da svake godine donosi precizan program utroška sredstava i da finansijska sredstva osigurana za finansiranje političke stranke koristi isključivo za ostvarivanje ciljeva utvrđenih svojim programom i statutom, da poslovne knjige vodi u skladu sa računovodstvenim propisima, da uspostavi potpune i tačne evidencije o gotovinskim tokovima putem blagajne, kao i evidencije o rashodima i obavezama stranke, da uspostavi sistem evidentiranja troškova i finansijsko izvještavanje koji će obezbijediti transparentnost utroška sredstava, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka. Takođe, u cilju obezbjeđenja potpune transparentnosti izvora finansiranja političke stranke preporučuje se korištenje transakcijskog računa za prijem donacija fizičkih lica.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2021. godinu, utvrđeno je da Laburistička stranka Bosne i Hercegovine nije ispoštovala preporuke revizije.

### 5. NALAZI I PREPORUKE

#### 5.1 NALAZI

**a) Laburistička stranka Bosne i Hercegovine je prekršila odredbe člana 4. stav (1)<sup>1</sup> Zakona o finansiranju političkih stranaka.**

(1) Prema podacima iz godišnjeg finansijskog izvještaja stranka je ostvarila rashode u ukupnom iznosu od 190.380,96 KM.

---

<sup>1</sup> U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

Laburistička stranka Bosne i Hercegovine je uz godišnji finansijski izvještaj za 2020. godinu dostavila Program utroška sredstava za 2021. godinu. U okviru ovog programa stranka je planirala ukupne rashode u iznosu od 234.650,00 KM, te nabavku opreme i sitnog inventara u iznosu od 10.000,00 KM.

Analizom dostavljenog programa utvrđeno je da je stranka različite vrste troškove planirala u jednom iznosu, kao što su npr. troškovi goriva i zakup vozila. Stranka je u programu troškove goriva i zakup vozila planirala u iznosu od 10.000,00 KM, što nije uobičajeno jer se radi o različitim vrstama troškova. Takođe, stranka je planirala troškove kancelarijskog materijala u iznosu od 3.500,00 KM, te troškove materijala za održavanje i režijskog materijala u iznosu od 10.000,00 KM.

Pregledom finansijskog izvještaja i finansijske dokumentacije, utvrđeno je da je politička stranka ostvarila troškove u iznosu od 8.341,08 KM mimo programa utroška, dok za troškove goriva nije moguće utvrditi u kojem iznosu su planirani, kako slijedi:

- Troškove električne energije politička stranka je prekoračila za 566,16 KM. U programu utroška sredstava stranka je planirala troškove električne energije u iznosu od 7.000,00 KM, a iste je ostvarila u iznosu od 7.566,16 KM;
- Programom utroška sredstava za 2021. godinu predviđeni su troškovi bruto plata i ostalih naknada u iznosu od 55.000,00 KM. Stranka je troškove bruto plata iskazala u iznosu od 52.352,25 KM, a naknade za topli obrok, prevoz, regres i sl. u iznosu od 6.570,67 KM, odnosno ukupno 61.922,91 KM, što je za 6.922,92 KM više u odnosu na planirane troškove;
- Politička stranka u programu utroška sredstava nije planirala ostale usluge, a iste je u godišnjem finansijskom izvještaju iskazala u iznosu od 852,00 KM; i
- Politička stranka je troškove goriva iskazala u iznosu od 11.016,99 KM. Stranka je u programu utroška sredstava troškove goriva i zakup vozila planirala u iznosu od 10.000,00 KM, pa nije moguće utvrditi u kojem iznosu su planirani troškovi goriva.

Napominjemo da je politička stranka Izmijenjeni program utroška sredstava za 2021. godinu u iznosu od 218.650,00 KM, Centralnoj izbornoj komisiji Bosne i Hercegovine dostavila tek uz godišnji finansijski izvještaj za 2021. godinu, dana 01.04.2022. godine, tj. nakon završetka izvještajnog perioda, te isti nije ni razmatran.

- (2) Politička stranka je u godišnjem finansijskom izvještaju iskazala troškove goriva u iznosu od 11.016,99 KM.

Kontrolom računa za gorivo koje je stranka dostavila u postupku pregleda, utvrđeno je da na računima dobavljača JKUP „Komunalije“ d.o.o. i „Sestre“ d.o.o. nedostaju podaci o vozilu u koje je točeno gorivo, te da isti nisu potpisani od strane političke stranke. Na računima dobavljača „EUROJET“ d.o.o.-Ćoralići naveden je broj tablica vozila u koje je točeno gorivo, te podaci o vozaču.

Prema podacima iz poslovnih knjiga stranka nema vozila u svom vlasništvu, te nije koristila zakupljena vozila.

Imajući u vidu navedeno, nije moglo biti utvrđeno da li su finansijska sredstva u iznosu od 11.016,99 KM korištena isključivo u svrhu obavljanja djelatnosti političke stranke.

Takođe, u postupku kontrole finansijskih izvještaja nije utvrđeno u koju svrhu su utrošena sredstva stranke koja su isplaćena po računima dobavljača „Alatuša“ Velika Kladaša u

iznosu od 116,90 KM i 403,19 KM, te računa Grafičkog preduzeća Velika Kladuša u iznosu od 260,00 KM<sup>2</sup>.

S obzirom da Laburistička stranka Bosne i Hercegovine nije sačinila program utroška sredstava za 2021. godinu na način kojim bi se obezbijedila potpuna transparentnost trošenja sredstava, kao i njegova uporedba sa ostvarenim troškovima, da je finansijska sredstva u iznosu od 8.341,08 KM utrošila mimo programa sredstava, a da za troškove goriva nije utvrđeno u kojem iznosu su planirani, kao i da je vršila isplate sredstava za koje nije moguće utvrditi koju svrhu su ista utrošena, prekršila je odredbe člana 4. stav (1) Zakona o finansiranju političkih stranaka.

**b) Laburistička stranka Bosne i Hercegovine je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Pregledom godišnjeg finansijskog izvještaja, utvrđeno je da Laburistička stranka Bosne i Hercegovine nije vodila poslovne knjige u skladu sa računovodstvenim propisima, nije uspostavila pravilne evidenciju o svojim rashodima i nije obrasce godišnjeg finansijskog izvještaja za 2021. godinu popunila u skladu sa Pravilnikom o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Laburistička stranka Bosne i Hercegovine nije u godišnjem finansijskom izvještaju iskazala sve organizacione dijelove političke stranke, čime je prekršila odredbe člana 10. Pravilnika.

Politička stranka je u obrascu 1.1 (organizaciona struktura političke stranke) godišnjeg finansijskog izvještaja iskazala samo Centralni ured u Velikoj Kladuši, iako je evidentno da ima organizacioni odbor i u Cazinu.

Naime, uvidom u Ugovor o zakupu poslovnih prostorija broj: 076/18 od 27.11.2015. godine, utvrđeno je da je Laburistička stranka Bosne i Hercegovine koristila poslovni prostor, površine 40 m<sup>2</sup>, u Cazinu, ulica Ćoralići Križ 139. Takođe, politička stranka je ostvarila i prihode iz budžeta Grada Cazina, što je i prijavila u svom finansijskom izvještaju.

- (2) Uvidom u dnevnik blagajne, čiji je promet u 2021. godini evidentiran u iznosu od 4.078,32 KM, utvrđeno je da su u toku godine putem blagajane uplaćena sredstva po osnovu članarine i donacija fizičkih lica, a koje su naknadno uplaćene na transakcijski račun stranke, kao polog pazara. Kontrolom pojedinačnih uplata, utvrđeno je da su sredstva na blagajni u blagajničkoj dokumentaciji i poslovnim knjigama evidentirana u nepostojećim novčanim apoenima, kao i da je članarina Amira Đogić koja je 31.12.2021. godine uplaćena na blagajnu u gotovini, evidentirana u iznosu od 2,32 KM.

- (3) Politička stranka nije uspostavila potpune i tačne evidencije o rashodima stranke, te ih nije pravilno iskazala u godišnjem finansijskom izvještaju u obrascu 4.1 (režijsko-administrativni i ostali troškovi), čime je prekršila odredbe člana 7. stav (2) i člana 22. Pravilnika.

-Politička stranka je sve troškove u finansijskom izvještaju prijavila kao troškove Centralnog ureda stranke u Velikoj Kladuši. U skladu sa odredbom člana 7. stav (2) Pravilnika, politička stranka ima obavezu da uspostavi evidencije o troškovima po organizacionim dijelovima, odnosno za svaki odbor pojedinačno, te da u godišnjem finansijskom izvještaju troškove iskaže za svaki organizacioni dio pojedinačno.

---

<sup>2</sup> Detaljnije navedeno u nalazu pod b).

-Kontrolom iskazanih troškova zakupa poslovnih prostora i ugovora o zakupu koje je stranka dostavila, utvrđeno je da je stranka troškove zakupa poslovnog prostora u Cazinu u iznosu od 6.000,00 KM iskazala u godišnjem finansijskom izvještaju kao troškove zakupa Centralnog ureda stranke u Velikoj Kladaši.

-Stranka je u godišnjem finansijskom izvještaju iskazala troškove amortizacije u iznosu od 4.000,00 KM. Uvidom u dostavljenu dokumentaciju utvrđeno je da stranka nije vršila obračun amortizacije, već je izvršila smanjenje vrijednosti opreme u iznosu od 4.000,00 KM na način da je proknjižila trošak amortizacije i ispravku vrijednosti opreme. Stranka pri tome nije sačinila dokument o procjeni vrijednosti opreme na osnovu koje je izvršeno knjiženje u poslovnim knjigama.

-Kontrolom dostavljenih računa za troškove materijala za promociju stranke, koje je stranka u godišnjem finansijskom izvještaju iskazala kao troškove ostalog materijala, utvrđeno je da su na ovom kontu knjiženi troškovi reprezentacije (pića i prehrambenih artikala), troškovi školskog materijala (bojanke, vježbanke, tuševi, olovke, šestar, geometrijski set i sl.) i cvijetni aranžman. Takođe, utvrđeno je da pojedini računi nisu potpisani od strane lica koje je primilo robu, odnosno materijal. Naloge za knjiženje računa odobrila je predsjednica stranke.

Uvidom u račun dobavljača „Alatuša“ Velika Kladaša broj: 0015 od 12.03.2021. godine u iznosu od 116,90 KM utvrđeno je da je izvršena nabavka prehrambenih artikala i sredstava za higijenu, kao što su: jogurt, supa, hrenovke, sardina, deterdžent i sl. Takođe, na računu broj: 0130 od 30.12.2021. godine u iznosu od 403,19 KM utvrđeno je da je izvršena nabavka prehrambenih artikala i sredstava za higijenu, kao što su: paštete, supa, riža, deterdžent, kalodont, četkica za zube i sl. Na računima nije navedeno u koju svrhu je izvršena nabavka navedene robe.

Prema podacima sa računa Grafičkog preduzeća Velika Kladaša broj: 013605 od 03.11.2021. godine u iznosu od 260,00 KM, stranka je nabavila školski materijal (bojanke, vježbanke, tuševi, olovke, šestar, geometrijski set i sl.), ali na računu nije navedeno u koju svrhu je izvršena nabavka materijala.

-Uvidom u ugovore o djelu koje je stranka evidentirala na kontu 402005 i iskazala u godišnjem finansijskom izvještaju, utvrđeno je da je stranka umjetniku-slikaru izvršila isplatu sredstava u iznosu od 500,00 KM na ime izrade umjetničkih slika i suvenira. U poslovnim knjigama nije evidentirana nabavka umjetničke slike niti suvenira, niti je stranka dostavila dokumentaciju iz koje bi se utvrdilo da je usluga izvršena.

-Sredstva koja je isplatila predsjednici stranke u iznosu od 30.450,00 KM i sredstva isplaćena za osam fizičkih lica-funkcionera stranke u ukupnom iznosu od 7.200,00 KM, kao i porez na dohodak i doprinose u iznosu od 8.325,32 KM, politička stranka je u poslovnim knjigama evidentirala na kontu 408001-*naknada za funkcije u stranci i ostale naknade*, te u finansijskom izvještaju iskazala kao troškove neproizvodnih usluga u iznosu od 45.975,32 KM.

U skladu sa računovodstvenim propisima i odredbama člana 12. stav (1) i stav (4) Zakona o finansiranju političkih stranaka, stranka je bila obavezna pravilno klasifikovati troškove, te ih u finansijskom izvještaju, u skladu sa odredbama člana 22. Pravilnika prijaviti po vrstama i u ostvarenom iznosu svakog troška pojedinačno.



- (4) Uvidom u potvrde o primljenim priložima koje su izdate fizičkim licima, koje je dostavila politička stranka, utvrđeno je da je politička stranka umjesto broja ličnog dokumenta upisala jedinstveni matični broj ili datum rođenja fizičkog lica, što nije u skladu sa odredbama člana 6. Pravilnika.

U skladu sa odredbama iz člana 6. Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

- (5) Uvidom u finansijsku dokumentaciju političke stranke i knjigovodstvene isprave utvrđeni su nedostaci kod dijela računa dobavljača koji su knjigovodstvene isprave o nastalim poslovnim događajima.

U skladu sa računovodstvenim propisima, knjigovodstvena isprava mora biti potpuna, istinita, računski tačna i uredna, sačinjena tako da omogućava potpun uvid u vjerodostojnost dokumenta. Sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

-Na računima dobavljača za gorivo JKUP „Komunalije“ d.o.o. i „Sestre“ d.o.o. koje je stranka dostavila u dodatnoj dokumentaciji, utvrđeno je da na računima nedostaju podaci o vozilu u koje je točeno gorivo, te prijem goriva nije potvrđen potpisom vozača (predstavnik političke stranke) na računima.

**c) Bez kvalifikovanja mišljenja, skrećemo pažnju na troškove ugovora o djelu po osnovu knjigovodstvenih poslova**

Stranka je za potrebe knjigovodstvenih poslova zaključila ugovore o djelu sa tri fizička lica, od kojih su kod dva lica ugovoreni isti poslovi.

Naime, Laburistička stranka Bosne i Hercegovine je u toku 2021. godine za potrebe knjigovodstvenih poslova i izrade završnog računa isplatila naknade po ugovorima o djelu zaključenim sa tri fizička lica u ukupnom iznosu od 13.200,00 KM.

Stranka je, 31.12.2020. godine, zaključila Ugovor o djelu sa licem ovlaštenim za finansijske izvještaje političke stranke, kojim mu je povjereno obavljanje knjigovodstvenih poslova i poslova finansijskog izvještavanja u 2021. godini uz neto naknadu od 600,00 KM mjesečno, te jednokratno 3.000,00 KM za obavljanje poslova ovlaštenog lica za finansijske izvještaje. Prema podacima iz poslovnih knjiga, ovlaštenom licu je u toku 2021. godine po ovom osnovu isplaćeno 9.600,00 KM.

Stranka je, dana 01.04.2021. godine, zaključila Ugovor o djelu sa fizičkim lice iz Velike Kladaše, za obavljanje knjigovodstvenih poslova i poslova finansijskog izvještavanja prema CIK-u u periodu od 01.04. do 31.12.2021. godine uz neto naknadu od 400,00 KM mjesečno, kojem je 14.12.2021. godine isplaćeno 3.200,00 KM.

Pored navedenog, stranka je 01.02.2021. godine isplatila neto naknadu certificiranom knjigovođi za izradu i ovjeru obrazaca završnog računa za 2020. godinu, a po osnovu Ugovora o djelu. Uvidom u Završni račun za 2021. godinu, koji je ovjeren od strane Finansijsko informatičke agancije-Poslovna jedinica Bihać, Ispostava Velika Kladaša 15.03.2022. godine, utvrđeno je da je i Završni račun za 2021. godinu pripremlilo isto lice.

U skladu sa odredbama Zakona o računovodstvu i reviziji u Federaciji Bosne i Hercegovine vođenje poslovnih knjiga pravno lice može povjeriti ugovorom, uz određenu naknadu, drugom pravnom licu ili preduzetniku registrovanom za pružanje računovodstvenih usluga.

## 5.2 PREPORUKE

*Preporučuje se Laburističkoj stranci Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da svake godine donosi precizan program utroška sredstva i da finansijska sredstva obezbijedena za finansiranje političke stranke koristi u skladu sa programom utroška sredstava, a isključivo za ostvarivanje ciljeva utvrđenih programom i statutom,*
- *da poslovne knjige vodi u skladu sa računovodstvenim propisima, odnosno da uspostavi pravilne evidencije o rashodima,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i*
- *da racionalnije troši finansijska sredstva stranke.*

### KOMENTAR:

U ostavljenom roku, Laburistička stranka Bosne i Hercegovine dostavila je primjedbe na mišljenje revizora i nalaze revizije date u Preliminarnom izvještaju o pregledu godišnjeg finansijskog izvještaja za 2021. godinu.

Primjedba političke stranke u kojoj ističe da dostavila Izmijenjeni program utroška sredstava za 2021. godinu nije uvažena jer je, kao što je u nalazu i navedeno, Izmijenjeni program utroška sredstava za 2021. godinu Centralnoj izbornoj komisiji Bosne i Hercegovini dostavljen 01.04.2022. godine, tj. nakon završetka izvještajnog perioda.

Služba za reviziju je uvažila sve argumentovane primjedbe političke stranke i u skladu sa istim korigovala nalaze revizije iz preliminarnog izvještaja.

Šef Odsjeka za revizijske poslove, revizor

Sanja Tošović

Šef Službe za reviziju

Mr. sc. Hasida Gušić